

# Trasmiscions per ladin e todesch

L tem é stat argoment de debatit ti ùltime tempes te la Provincia de Trent tant per chel che vèrda la programazion de la RAI che per la RAS

L tem de la produzion e del slariament de la trasmiscions televisives ti lengac ladin e todesch é stat al zenter de la discusion ti ùltime tempes te la provincia de Trent per doi costions desvalives.

La pruma costion revèrda più davejin i ladins, e la é nasciuda aldò de polemiches sutèdes fora per via del bando metù fora da la RAI per l potenziament de la redazion ladina, che ge à defat serà i ujes ai fascegn e a duc i ladins no enciasé te la provincia de Busan. Sun chest tem se à moet apontin chisc dis ence l'assessor regionèl a la mendranzes linguistiches Luigi Chiocchetti.

La seconda costion revèrda enzeve l slariament de la trasmiscion da pèrt de la RAS, la Azienda Spezièla Radiotelevizion per la Provincia de Busan, che à tacà chisc dis a manèr fora i programes ence sul tegnir de la provincia de Trent.

## Chiocchetti domana informazzions sul bando RAI

Chisc dis passé l conseier Luigi Chiocchetti se à mobilità su la costion del bando per l'assunzion

de personal metù fora da pech da la RAI per potenzièr la redazion ladina.

Chiocchetti, te sia encèria de assessor regionèl a la mendranzes linguistiches, dò aer ciapà desvaliva segnalazzions e lamentanzes en cont del medemo bando e de la selezion en costion, l'à palesà sia marevea, nasciuda prum de dut per l fat che vegne tout dant demò giornalisé che sà l ladin de Gherdena e dapò – amò de più – per l fat che a la selezion sie stat ametù demò chi che podea prejentèr la declarazion de partegnuda al grop linguistich ladin data fora dal Tribunèl de Busan, ge nean de fat l derit de tor pèrt al concors a duc i giornalisé ladins che no é enciasé te la Provincia de Busan.

Chiocchetti à volù ge domanèr informazzions en cont de chest ai doi presidenc de la Provinzie de Trent e de Busan, Luis Durnwalder e Alberto Pacher, palesan l'augurie che chest no sie n tentatìf de marginalisèr na pèrt di ladins.

Te la nota de Chiocchetti vegn amò apede recordà che ence la Provincia de Trent à metù en esser na convenzion con la RAI, e aldò de chela convenzion (nr 1988 /2010)

la PAT ge dèsc a la medema RAI la soma de zirca 240.000 euro a l'an acioche i programes per ladin e chi per todesch de "Sender Bozen" posse vegnir slarié fora sun dut l tegnir de la Provincia de Trent.

Chiocchetti domana donca na maor sinergia anter la doi provinzie de Trent e de Busan per la gestion de la trasmiscions per ladin che vae te la direzion de n stravardament di deric de duc i ladins.

## I programes todesch de la RAS ence tel Trentin

Amò neves per chel che vèrda la televizion. Entorn la fin de mé l



La tabela de la Redazion RAI de Busan.

conseier ladin Luigi Chiocchetti aea portà dant te Consei provinzièl na

proponeta de mozion per spenjer acioche che vegne slarié fora tel Trentin i programes de la televizion tel lengaz todesch, de valuta per i trentins che vel emparèr l lengaz todesch, ma ence per duc i foresé de mèrè lenga todesca e per la comunanzes mochena e cimbra. Sia proponeta era stata aproèda a gran maoranza, con 24 stimes a favor e demò un astegnù, e te chela ocazion l'assessor Mauro Gilmozzi aea fat a saer che i contac per chest obietif era jà stac envié via da canche l'é jìt en doura l passajes al segnèl digitèl. Chest usc é stat ori dal moment che la RAS à pissà de se emprevaler del ripetitor de la Paganella, sul tegnir de la Provincia de Trent, per fèr ruèr delvers sia trasmiscions sun dut l raion più a sud de la provincia de Busan, olache no semper e daperdut i podea i veder delvers.

A chesta vida, con chest meis de jugn, ence sul tegnir de la provincia de Trent se à podù veder i programes per todesch. L servije é limità endèna al raion cori dal ripetitor de la Paganella, e ades l'é en cors contac per veder de slarièr fora la difujon sun dut l tegnir provinzièl. Te la



L'assessor regionèl a la mendranzes linguistiches Luigi Chiocchetti.

cordanzes l'é da fèr fora chi che se tolessa sù la speisa e l lurier per l slariament e per la manutenzion de la rei. La neva del slariament de la trasmiscions de la RAS te dut l raion, en pèrt sul tegnir de Busan e en pèrt sun chel de Trent, cori dal ripetitor de la Paganella, vegnarà prejentèda te curt temp, fosc jà en mèrtesc che vegn ai 18 de jugn, a Trent, e te chela ocazion sarà fosc l met de aer de autra e maor informazzions sui vèrsc che fossa de besegn per poder slarièr l servije ence sun dut l tegnir provinzièl. (lg)